

2291
DISCOVRS

Sur l'arrest faict de la per-
sonne de Monsieur
le Prince.

MDCXVI.

THE NEWBERRY
LIBRARY

Case
F

39

326

1616 dis

DISCOVRS

Sur l'arrest faict de la
personne de Monsieur
le Prince.

N O V S auons veu avec quelles brigues, avec quelles menées quelques grands du Royaume, plus desirieux de leur proffit particulier que du bien public, se sont efforcés depuis quelque temps de seduire le peuple sous vn faux pretexte de reformation. Nous auons veu avec quelle moderation, & douceur la Reyne mere du Roy, plus soigneuse de la tranquillité publique que de son autorité particuliere, a tasché de les contenter par tous moyens conuenables, & de les ramener à leur deuoir par la raison. Nous voyons maintenant, & nous le voyons avec vn deplaisir & regret extreme, que ces remedes benigns qu'on auoit creu iusqu'à cette heure estre à cause du bas aage du Roy les plus propres à la guerison de nos maux, ne les ont pas tant finis que changez. Tous ces traictez, tous

ces accords, qui coustent tant au peuple, n'ont esté pour tout que cures palliatives. L'euenement l'a tesmoigné. Car lors que nous estimions toutes choses tellement composees & restablies par la conserance de Loudun, qu'il n'y eust plus rien à craindre de long temps pour ce regard; voila que tout à coup cette nouvelle conspiration se descouure, & se descourant comble de frayeur & d'horreur tous ceux auxquels il reste tant soit peu de cette autresfois si renommee fidelité Françoisse: La seule pensee me transit encore les sens d'un morne & funeste engourdissement.

Que ceux aux desirs ambitieux & turbulents desquels sa Maiesté desireuse du repos de son peuple, auoit ployé, & si j'ose passer le mot, comme partagé en quelque façon son autorité Souueraine, ayent proposé, que dis-je proposé? ayent resolu, ayent coniué, de se saisir, des'emparer de sa personne. O barbarie obominable! ô perfidie prodigieuse! & tellement prodigieuse, que ceux mesmes qui l'ont conceüe, n'osent l'aduouër: Aussi est ce le retranchement commun de tous ceux qui sont interessés en ce fait que de le nier: Quelle apparence, disent ils & que des gens, qui tenants les premiers rangs dans l'Estat, en sont

comme les tuteurs subalternes ayent tant entrepris contre celuy de la faueur & bienueillance duquel depend apres Dieu leur fortune & leur vie ? Et à la verité , s'ils auoient tousiours esté tels qu'ils veulent estre estimez , il seroit fort malaisé que l'accusation dont ont les charge , trouuast aucune prise sur eux. Personne ne vient de plain pied à ces grands & enormes crimes : On n'y monte que par degrés : Mais quiconque aura pris la patience de rappeler en sa memoire leurs deportemens passez , recognoistra clairement , que tout ce qu'ils ont faiët depuis quatre annees en ça n'a esté qu'vn continuel apprentissage , & comme vn avant-jeu du coup qu'ils viennent de faillir. Car ces sôt ceux la mesme qui ayants formé vn party secret dans l'Estat sur les cendres du feu Roy , l'ont rempli de factions & partialités intestines. Ce sont ceux la mesmes qui après plusieurs menées tant dedans que dehors le Royaume ont surpris tout à coup des places fortes , ont changé les gouuerneurs , ont saisi les deniers royaux , ont leué les armes , & pour signaler leur puissance par les ruines publiques , ont tellement rauagé , tellement foulé , tellement desolé les lieux ou ils ont passé , qu'ils n'y ont laissé au pauvre peuple

autre chose que le subiect de les detester & maudire : La Picardie, la Champagne, & toute la Guyene portent, & porteront encore long temps les funestes marques de leur auidité, de leur cruauté.

A gens qui ont vne fois osé toutes ces choses-la, que reste il pour comble de fureur sinon d'estendre les mains sur la liberté de celuy, de qui ils ont desia foulé en tant de façons l'autorité aux pieds? Si ce n'est par aduventure qu'ils nous veuillent persuader que tout cela s'est fait pour le service du Roy, & la restauration du Royaume. Mais, ô Dieu! seroit il bien possible, ie le diray encore vne fois, seroit il bien possible qu'il y eust aujourdhuy des gens parmy nous si sots & si stupides que de le croire? Que pouuons nous, ie vous prie, souhaiter autre chose aux ennemis de cette Couronne, s'il luy en reste quelques vns, sinon des reformateurs semblables à ceux cy? Qui faignants de redresser quelques abus introduicts par la necessité des affaires, ou la corruption des mœurs, ont perverti toutes sortes de loix, & tellement travaillé l'Estat par vn remede pire que la maladie, qu'il luy faudra dix anneés pour se remettre: comme qui pour dessecher quelque legere fluxion tombee sur vne iambe ou sur vn

bras couperoit toutes les veines basiliques, comme qui pour purger vne chambre de quelque mauuaise senteur mettroit le feu aux quatre coings de la maison. Au bout, encore a-il fallu que le Roy pour arrester le cours des miseres chacun iour croissantes, suiuant en cela, comme en tout le reste, les doux & sages conseils de la Reyne, sa mere, ayt faiët semblant d'approuuer leurs sinistres intentions, & de trouuer bon qu'ils ayent essayé iusques ou sa patience les pouuoit supporter: Et tout cela à ses despens. Car le Berry à l'vn, le Taillon à l'autre, & quelque chose à tous, ont esté, comme chacun sçait, les seaux du dernier accord: Rien ne se faisoit sans cela; signe infallible, que tout se faisoit pour cela. Je tais vne infinité de conditions des articles secrets si honteuses, si preiudiciables à celuy qui les pouuoit tous perdre dans six mois s'il eust voulu, que l'honneur de nostre nation nous oblige d'en cacher la cognoissance aux estrangers. Chose veritablement deplorable, que le fils, que le successeur de ce grand Prince, qui auoit donné la loy à tous ses voisins, l'ayt receüe de ses propres subjects.

Encore pleust-il à Dieu qu'ils en fussent demcurez-là: Mais comme l'audace qui a

vne fois rompu le frein des loix ne peut
 estre arrestee que par sa ruine, à peine eu-
 rent ils recueilly les fruiets de leur traicté,
 que croyants n'auoir rien fait, s'ils n'ache-
 uoient ce qu'ils auoient commencé, c'est à
 dire, s'ils ne reuiersoient entièrement l'au-
 thorité Royale, desia fort rudement es-
 branlee; ils se rassemblent en diuers lieux
 secrettement, renoüent leurs desseings, re-
 prennent leurs mesures, & tout d'un coup,
 tandis qu'ils esbloüissent le peuple par l'es-
 clat de leurs somptueux, & magnifiques fe-
 stins, s'emparent de Peronne. Ceux qui
 cognoissants leurs intentions, auoient tres-
 bien iugé dès long temps auparauant que
 l'affaire de Picardie laissée indecise seroit la
 semence de quelque trouble nouveau,
 creurent aussi tost que la surprise de cette
 place estoit le fondement d'une troisieme
 rebellion. Le Roy aduertty sur cela, par la
 Reyne sa mere & ses Ministres, de l'import-
 tance de l'affaire, la prend à cœur; y escrit,
 y enuoye; on liët, on escoute, mais c'est
 tout; car à gens qui depuis quelques an-
 nees ont tourné la foiblesse de leur Maistre
 en reuenu, l'obeissance est vn crime. Si
 auoient-ils à craindre qu'appuyé de la nou-
 uelle alliance d'Espagne, il ne leur voulust
 tesmoigner ce qu'il pouuoit par la force sur
 ceux

ceux qui ne plient point à la raison. C'est pourquoy mettants tout respect sous les pieds, & preferants l'assurance de leur fortune à l'obligation de leur conscience; ils se delibrent de l'asseurer de sa personne, & ne luy laissant qu'une autorité preciaire mesurée à leur utilité, luy oster to^t ceux qui l'eussent peu faire souuenir qu'il est né pour commander. C'estoit ce que ce vieux & malheureux ouurier de factions, leur esprit familier, & commun dæmon, vouloit dernièrement donner à entendre au Prince d'Orange, & au Comte Iean de Nansau, qui l'estoient venus visiter. Vous voyez, leur dict-il, l'autorité & la reputation en laquelle nous auons mis Monsieur le Prince. Reste maintenant qu'il s'y sçache maintenir: pour le faire, il fault qu'il signale son retour à Paris par quelque grande, genereuse, & memorable entreprise. O paroles vraiment tragiques! & que ie ne puis ouïr sans battre du pied la terre. Comment? releuer de si beaux & si magnifiques noms la plus insigne, la plus lasche, la plus execrable trahison qui fut iamais: Miserable que tu es! N'auois tu donc gagné par tes charmes foreille & la creance de celuy que tu as perdu, que pour executer par les mains sur le fils ce que tu auois vainement essayé

sur le pere? O France, pauvre France, ou en estois-tu si le malheur de tes destinees eust fauorisé ce dessein? La iournée de Massere, ny celle de Poictiers, ny celle de Pauie, ne te coustèrent iamais tant.

Car avec quels artifices, avec quels ressorts n'eussent-ils façonné ce jeune esprit à la patience de leurs tyrannies? Nous n'eussions de dix ans eu Roy que semblable à ceux de la galerie peinte du Louure. Et encore ne sçait-on si au bout de ce temps; mais j'ay horreur de dire ce que ie pense: chacun se le peut imaginer: Non que ie veuille trop legerement presumer rien de tel de Monsieur le Prince. Je ne croy pas qu'il y ayt iamais pensé iusqu'à cette heure. Mais la prosperité, qui est la chose du monde la plus malaisée à digerer, eleue quelquesfois des fumees d'ambition si fortes qu'elles font tourner le cerueau. Et la douceur de commander absolument vne fois fauouree est telle, qu'on ne s'en soule que fort tard. Adioustés y maintenant les flatteries de ceux qui interessés en sa fortune luy eussent à toutes heures coulé par les oreilles iusques au cœur vn poison d'autant plus dangereux qu'on ne s'en peut garentir par l'essay. On sçait ce que s'en estoient desja promis quelques vns des siens, qui en

leurs reiouyssances ordinaires reueilloient leurs malheureuses esperances par ce mot de funeste presage, specifié dans la Declaration du Roy. Quelle pitié! Qu'une poignée de jeunes debauchés, alterés du sang de leurs ennemis, affamés du bien de leurs voisins se jouâst insolemment entre les verres avec des paroles doubles de la fortune publique. Qu'un grand & puissant Estat, comme cetui-cy, composé de tant de diuerses pieces, cimentées du sang genereux de nos ancestres, se partageast, comme vn mets de festin, sur la table du commun.

Qu'on me die maintenant, que pouuoit apres tout cela moins faire le Roy que d'arrester les pernicieux desseins de telles gens en la personne de celuy de l'autorité seule duquel ils les couuroient? Ne se fust-il pas rendu coupable des malheurs qui en eussent peu arriuer, s'il eust mesprisé les aduis que toutes sortes de personnes luy en donnoient tous les iours de tous costez? Nous ouysmes ces iours passez ce que sa Maiesté, elle mesme seant en son lié de Iustice, en declara en plein Parlement, par la bouche de ce vertueux & bien-disant personnage, qui suiuant l'ancienne coustume du Royaume, luy seruit de truchement en cette solennelle action: Nous l'ouysmes, & en de-

meurafmes eſtōnez. Car comme ſi elle fuſt
 venuë-là tout expres, ou pour rendre com-
 pte de ſes aſtions, ou pour demãder iuſtice
 de ſes ennemis, elle eſclaircit la verité de
 tout ce qui ſe paſſoit par le rapport de tant
 de particulieres circonſtances, qu'il fault
 malicieuſement fermer les yeux pour ne la
 pas voir. Et neantmoins il y en a encore qui
 deſireroient qu'elle euſt nommé l'un apres
 l'autre ceux qu'elle designa: Gens imperti-
 nents. Ils deuroient d'oc par meſme moyen
 demander qu'elle fiſt apres cela deſſences
 de luy deſcouvrir à l'aduenir rien de ce
 qu'on trameroit contre ſon autorité: Car
 ou eſt celuy qui le vouluſt faire ſil ſçauoit
 qu'on l'iroit tout auſſi toſt en le reuelant ex-
 poſer à la haine & à la rage des accuſez? Di-
 ray-ie plus clairement ce que ie penſe de
 ceux qui tiennent ces langages? O qu'il ſ'en
 fault peu qu'ils ne deſirent qu'on ayt peu
 faire, ce qu'ils ne croient pas qu'on ait vou-
 lu faire! Certes la condition de Princes,
 comme diſoit autrefois cet Empereur Ro-
 main en ſe plaignant, eſt en cela tres-miſe-
 rable, qu'on ne croit pas les conſpirations
 dreſſees contre leur vie qu'apres le coup
 faiſt.

Qu'il n'y euſt neãtmoins quelque nou-
 ueau deſſein de remuement, ceux qui ſça-

uent tant soit peu ce qui se passe, sont contraincts de le recognoistre : Cela est trop clair. Mais quelques vns soustienent que s'il s'estendoit iusques au dedans du Louure, il se terminoit en la personne de la Reine mere. En quoy certes ils ne font pas leur cause beaucoup meilleure: Car qui ne void qu'on ne la pouuoit heurter en façon quelconque que le contrecoup ne portast sur celuy, qui luy doibt outre le bon-heur de sa naissance, & de sa nourriture, la conseruation de son heritage? Cette affection naturelle, qui les lie si estroictement par tant de iustes & charitables debuoirs ne peut souffrir qu'on diuise, qu'on separe leur fortune: La peine de l'vn seroit la douleur de l'autre: Et ie ne croy pas que le Roy creust d'estre en liberté s'il voyoit sa mere en seruitude: Et neantmoins ils auoient resolu de la confiner dans vn Cloistre, qui est à peu pres dire, l'enfeulir toute enuie: Quelle cruauté! Estoit-ce donc-là, dictes moy ingrats que vous estes, estoit-ce la recompense de tant de veilles, de tant de peines, de tant de soucy, de tant de trauaux, avec lesquels elle a maintenu cette heureuse, & longue paix dans l'Estat? Mais ou ay-ie l'esprit de parler de la paix, comme d'un bié desirable à ceux qui ne nourrissent

leurs ambitieuses esperances que des diuisions & calamitez publiques? C'est volontiers pour cela mesmes qu'ils luy en veulēt: Car quel autre subiet en peuuent ils auoir?

Si ce n'est peut estre de ce qu'elle a fait plus de bien qu'ils ne voudroient à des personnes qu'ils n'ayment point: Et voila le plus grand de leurs griefs: Par ce qu'ils croient qu'on leur oste ce qu'on donne à autres qu'à eux; qui neantmoins d'ailleurs ont receu de la mesme main toutes sortes de faueurs & liberalitez: Quelle iniustice est donc la leur de vouloir restraindre les beneficences royales à leur vtilités particulieres? Mais ce sont estrangers: Estrangers, tant que vous voudrés, pour le moins n'abusent ils point des biens qu'ils reçoient, contre ceux de qui ils les reçoient. L'amitié des Roys naturalise sans autre lettres ceux auxquels elle s'attache vne fois: Chacun doit estre estimé né au pays pour lequel il est né: A votre aduis pensés vous que lors que ie lis l'histoire du Roy Iean, ie tiene Charles d'Espagne quoy que venu de dehors pour estranger, & le Comte de Harcourt, quoy que conceu en France pour François? Nullement: car celuy la gaigna tellement par ses seruices la bienueillance de son maistre, qu'il le fist Connestable

apres la mort de Raoul; celui-cy au contraire l'offensa si viuement qu'il fallut que pour expiation de sa faute il laissast la teste sur vn eschaffault. Le mesme pouuons nous dire de ceux-cy : Car pourquoy voulés vous que ie repete estrangers ceux qui obseruants les loix du pays qu'ils habitent, se contiennent avec affection, zele, & respect, dans l'obeyssance du Souuerain; & que i'estime François ceux qui troublants la concorde & tranquillité publique ne recognoissent l'authorité du Prince qu'autant quelle leur est vtile & profitable? Que nous ont fait autresfois de pis les Anglois, ou les Espagnols?

Et neantmoins à les ouyr dire iusques à cette heure, il n'y auoit qu'eux d'affectionnez au bien & seruice du Roy. Ils ne parloient, ils ne protestoient que de leur sincerité, que de leur fidelité. Pendânt que sous main ils tramoient des desseins tellement esloignez de leurs discours, que si on ne les eust rompus en la personne de leur Chef, la France seroit maintenant au plus calamiteux estat qu'elle fut iamais. Au partir dela encore se plaignent-ils de ce qu'on ne les a pas laissé faire. Arrêter vn Prince, vn premier Prince du sang? Quelle hardiesse? C'est ce qu'ils font sonner malicieusement,

ce qu'ils font retentir seditieusement par tout. Comme si cette qualité, pour grande & venerable qu'elle soit, portoit permission d'entreprendre impunément contre celuy mesme de qui elle tient par communication l'eminence de cet honneur qui la releue. Non que veritablement nous ne l'honorions, nous ne la reuerions grandement d'ailleurs, cōme nous deuons; mais si elle apporte, si elle attribuë quelque aduantage, quelque pouuoir à celuy qui en est honoré, nous desirons que ce soit pour la conseruation, & non pour la dissipation du pays: Duquel quiconque a vne fois troublé ou renuersé l'ordre, il s'y rend indigne des prerogatiues que sa naissance luy dōne.

Que si ce n'est pas assez de faire les choses avec raisō, si on ne les fait encore avec exēple, qui ne sçait que le Duc d'Orleans beaufrere de Charles 8. auquel il succeda depuis en la Courōne, fut mis dās la tour de Bourges par Madame de Beaujeu sœur du Roy? Où il va de l'Estat, où il va du repos public, il n'y a cōsideratiō de qualité, cōsideration de parenté qui tienne: On n'espargne mesmes pas en ces choses la ses enfans propres. Je passe sous silence la seuerité memorable avec laquelle ce grād & genereux Romain sacrifia les siens à la liberté de son pays: Ce
qui

qui est si estoigné de nostre temps, ne nous touche que fort legeremēt: Venōs au siecle dernier: Nous auōs tous ouï parler de quelle façon le plus puissant Prince de nos voï-
sins punit les mauuais déssins de son fils, & de son fils vnique: Il l'enuoya en prison, & de la prison au tombeau. La mauuaïse fortune de la France n'a point iusqu'à cet heu-
re obligé aucun de nos Roys à la necessité malheureuse de cette rigueur. Mais nous en auons eu qui sur des simples ombrages & deffiāces de ceux qui leur deuoyent succe-
der les ont contrains de s'esloigner d'eux, & de preuenir leur indignation par vn ban-
nissement volontaire: Quiconque aura leu les vies de Charles 7. de Louys II. & de Charles 8. verra que cette ialousie leur a esté comme hereditaire & naturelle.

Il ne faut donc pas trouuer estrange que sa Maïesté aduertie des malheureux des-
seings qu'on formoit sur sa personne, & sur celle de la Reyne sa mercayt faict arrester dans le Louure celuy sous le nom duquel ils se conduisoient: Elle l'a peu par son au-
thorité, elle l'a deu pour nostre bien; ie di-
ray plus, pour le bien de celuy mēme du-
quel on deplore le malheur. Car ce n'est pas l'auoir faict peu pour luy, que de l'auoir tiré d'entre les mains de gens qui eussent ache-

ué de le perdre s'il leur fust demeuré: On ne luy a pas, à bien prendre les choses, tant retranché sa liberté, qu'à eux la commodité d'en abuser. Il est traité selon sa qualité là où il est, & à peine ressent il en autre chose son changement qu'ès noms & liures de ceux qui le seruent: Les Princes du sang de Perse estoient autresfois gardés de cette sorte toute leur vie, de peur qu'ils ne remuassent, iusqu'à ce que l'ordre de la succession les appellast à la Couronne: Costume qui s'observe encore aujourdhui fort religieusement en la Chine, nation renommée d'une excellente sagesse.

Comment, qu'il y soit, il ne tiendra qu'à ceux qui sont cause qu'il y est, qu'il n'en sorte dans peu de temps: Car si recognoissants leur faute, ils rendent au Roy, comme ils doiuent, des preuues suffisantes de leur repentance, par des vrayes, sinceres, & conuenables soubmissions, il leur fera voir à tous qu'il n'est pas moins heritier de la clemence que de la Couronne de son Pere: Il le leur a promis, il le leur tiendra. Que si au contraire ils conuertissent, comme ils ont fait iusqu'à cett'heure, sa douceur, & benignité naturelle en occasion, & licence de le trauerser, qu'ils se prennent garde, qu'il ne leur face viuement ressentir le danger

qu'il y a de tourner la patience de son Maître en fureur. Il est desia grand, s'il estend, s'il roidit vne fois ses bras contr'eux, il les abbatra sans ressource. Cent tours comme la grosse de Bourges ne les garentiront pas: Car ce sont à la verité de braues & genereux Princes, remplis de courage & de valeur, qui le peut nier? mais toute cette puissance qui les esleue sur le reste de la Noblesse s'affoiblit à mesure qu'ils s'esloignent du Loure, comme la force des Planettes à mesure qu'elles s'escartent de leur maison. Je ne doute point que la creance qu'ils ont dans leurs gouuernements, ne leur attire quelques vns d'entre ceux qui ont attaché plus estroittement leur fortune à la leur: C'est pour tenir la cāpagne quelques mois: Mais au bout, si faut-il qu'ils ioignent, & cela arriuant, qui ne void que la perte seule d'une bataille les perd tout a fait? Car ils n'ont point de villes qui leur fassent espaulle, & qui est bien plus, n'en auront point. Ils ont beau colorer leurs manifestes de ces beaux & specieux noms de reformation, de reglement, de soulagement; on se moque de cela: le peuple a esté si souuent bercé, si souuēt endormy, si souuēt pipé de ces promesses-là, qu'il aymera mieux souffrir son mal en patience, qu'essaier ces souuent per-

nicieux, & tousiours inutiles remedes: On a veu cōbien peu ce leurre l'a attiré iusqu'à cette heure. Pour ceux de la Religion, c'est vne pure resuerie de s'imaginer que n'estant point icy question de la liberté de leurs cōsciences, ils veulent attirer sur eux la malveillance & la haine de celuy qui ne l'entamant nullement leur oste toute occasion de se plaindre: Quasi tous les principaux d'entr'eux sont au Louure tous les iours.

Depenser qu'au deffault de cela ils trouvent chez nos voisins de l'appuy en vne cause tant de fois descritee, comme la leur, c'est grandement se tromper: Car ou cela? En Allemagne? à la verité s'ils auoient encore dans leurs coffres les vingt millions que leurs equippees coustent au Roy depuis trois ans, ils le pourroient peut estre esperer: mais ce nerf de guerre leur manquant, ils n'auront ny Suisses, ny Reistres. On ne fait point passer de riuieres en armes à ces gens-là que sur des ponts d'argent. Pour ce qui est de l'Angleterre, il ne fault non plus qu'ils en attendent aucun secours contre celuy duquel elle a depuis peu recherché l'Alliance par cette extraordinaire Ambassade que nous vismes dernièrement avec vne egalle allegresse & admiration: Celuy qui y commande aujourd'huy est vn

Prince sage, doux, paisible, & qui d'ailleurs sçait combien il luy importe d'empescher que son peuple naturellement fier & remuant n'essaye en pays estranger ce qu'il pourroit par les armes dans le sien: Le mesme en fault-il iuger des autres Potentats de l'Europe, qui tous interessez en la cause du Roy craindront sagement d'autoriser par leur exemple la rebellion de leurs subiects contre eux mesmes: Autant leur en pend-il sur la teste. Et quand ils se pourroient promettre quelque assistance de ces endroiets la, que seroit tout cela en comparaison de celle que sa Maiesté pourroit tirer d'Espagne, si la necessité, qui est vne rude & impetieuse maistresse, l'y obligeoit? Ses predecesseurs se sont autresfois au besoing seruis de celle du Turc fort vtilement.

Adioustons à cela vne autre consideration qui n'est pas de legere importance: Personne n'ignore que la bonne intelligence est l'ame d'un party, quel qu'il soit: il ne peut subsister, il ne peut durer sans cela. Or quelle peut elle estre entre gēs, qui n'estāts liez d'aucun cōmun interest ne recherchent que leur aduantage particulier? Leur ambition seule, quand il n'y auroit autre chose, les diuifera, & les diuisant, les rompra: Car de tant qu'ils sont maintenant à peine

y en a-il vn qui voulust en quoy que ce soit, auoir cédé à l'autre : Il n'y a plus de Prince du sang parmy eux : Quand il faudra battre aux champs, ils seront comme le Serpent à plusieurs testes, auquel ce Bacha comparoit les Princes Allemands; l'un tirera d'un costé, l'autre de l'autre; ils se demembrent d'eux mesmes.

Mais ie veux que nō obstant tout ce que ie viens de dire, la fortune, qui peut beaucoup en la guerre, ou le malheur de la Frâce, ou quelque autre chose les mist pour quelque temps au dessus du vent, si deurent-ils tousiours craindre l'aduenir : On pourroit s'en fouuehir en tēps & lieu : On sçait cōme Louys II. suiuant le cōseil de Sforze, se vāgea des autheurs de la guerre du bien public, auxquels il porta toute sa vie, cette haine irreconciliable, tesmoignée à la posterité par l'inscription qu'il fit mettre sur le tombeau de l'Euesque de Chartres : Il ne pardonna pas à Charles mesme son frere, duquel il est creu auoir à cette occasion aduancé la fin : Ceux qui sont maintenant à Soissons ont subiect d'apprehender qu'on ne les traite de mesme, s'ils ne reuiennent à Paris dans le temps qui leur est limité.

Sur quoy ie diray vne parole hardie, mais veritable : Nos Roys ont esté trop

indulgens , trop faciles depuis quelque temps : car à quiconque a tiré l'espee contre eux, il semble qu'ils n'ayent eu autre chose à opposer qu'un fourreau d'or : Et a on veu bien souuent que des mesmes deniers dont ils auoient racheté la paix, ceux mesmes qui venoient de les receuoir en dressoient des nouuelles armées pour la troubler : Cen'estoit qu'à recommencer : Il est temps qu'ils s'en fassent accroire désormais, & qu'ils montrent vne fois pour toutes à leurs subiects ce que peut leur colere sur ceux qui abusent trop souuent de leur bonté : Mais nous esperons, que ceux dont il est à cette heure question, recognoissants franchement les obligations tres estroites qu'ils ont tous à sa Maiesté, tant en general, qu'en particulier , & craignants prudemment d'aiguiser son indignation cõtre leurs testés, reuiendront promptement au chemin dont ils se sont escartez , & aymeront mieux essayer sa clemence que sa fureur : Nous les en coniuurons par la dignité de leurs naissances, par la generosité de leurs courages , par la memoire de leurs ancestres, & par la chose qui comprend tout cela, l'affection naturelle du pays : C'est à eux d'y penser meurement pour leur bien , & à nous qui le desirons pour le nostre, de prier

ardemment celuy qui tient les cœurs des grands en ses mains, de fleschir les leurs, & les tourner au desir du bien & repos commun.

Seigneur Dieu, autheur de concorde, & de paix, qui auez commencé ce grand bastimēt de l'vniuers par l'accord des qualitez ennemies dont il est composé, iettez l'œil de vostre pitié sur ce pauvre peuple, & inspirāt de vos saints cōseils ceux desquels apres vous depend icy-bas son repos, réunissez-les d'yn si ferme & si durable lien de dilection & de charité, qu'aucune passion, aucune consideration humaine ne les puisse iamais diuiser: Que si s'endurcissants en leurs haines ils preferent ambitieusement leurs interests à vos mouuements, renuersez-les, dissipez-les, confondez-les de telle sorte, que l'exemple deplorable de leur ruine contienne tous ceux qui viendront apres en leur debuoir par la crainte d'vne si funeste & rigoureuse vengeance.

F. I. N.